

07 NOV 1999

GUS DUR BERLEPAS KE YANGON

KUALA LUMPUR, 7 Nov (Bernama) -- Presiden Republik Indonesia Abdurrahman Wahid berlepas ke Yangon, Myanmar hari ini dengan pesawat khas setelah mengadakan lawatan kerja ke negara ini sejak semalam.

Menteri Luar Datuk Seri Syed Hamid Albar ialah antara yang berada di Lapangan Terbang Sultan Salahuddin Abdul Aziz Shah, Subang, di sini untuk mengucapkan selamat jalan.

Abdurrahman yang juga dikenali sebagai Gus Dur tiba di sini semalam sebagai sebahagian daripada kunjungan membiasakan diri ke lapan negara Asia Tenggara bermula dengan Singapura.

Abdurrahman diiringi oleh delegasi 40 anggota termasuk isteri beliau Sinta Nuriyah dan dua anak perempuannya Inayah Wulandari dan Zanuba Arifah Chefsoh.

Semalam beliau mengadap Yang di-Pertuan Agong Sultan Salahuddin Abdul Aziz Shah di Istana Negara sebelum mengadakan pertemuan dengan Perdana Menteri Datuk Seri Dr Mahathir Mohamad.

Abdurrahman dipilih sebagai presiden keempat republik itu pada 20 Okt lepas menggantikan B.J. Habibie.

-- BERNAMA

NM LAT